



17



C E SONT LES CONCLVSIONS
ciuiles, que met pardeuant vous, Nossei-
gneurs tenans la Cour de Parlement, Da-
me MARIE BOCHART, vefue de feu Mes-
sire PIERRE DE PROVVILLE, viuant Che-
ualier Seigneur dudit lieu & de Hangars, Sergent ma-
jor des ville & Citadelle d'Amiens, tant en son nō que
comme mere & tutrice des enfans mineurs dudit de-
funct Sieur de Prouuille & d'elle, demanderesse & ac-
cusatrice ALENCONTRE de feu CONCINO CONCINI
Marquis d'Ancre, de LEONORA GALIGAY sa vef-
ue, & de leurs complices defendeurs & accusez: A ce
que ledit defunct Concini, & ladite Galigay sa vefue, & au-
tres complices soient declarés bien & deuëment atteints & con-
uaincus de crime de leze Majesté, pour raison du meurtre de-
testable & inhumain proditoirement commis en la personne du-
dit feu Sieur de Prouuille, Sergent major desdites ville & Cita-
delle d'Amiens, de leur ordonnance, instigation & induction:
pour en ce faisant vsurper vne domination tyrannique & abso-
luë dans ladite place, contre l'autorité du Roy & la
paix & tranquillité de son Royaume. Et que pour reparation
ciuile, dommages & interests de la demanderesse, ils soient
condamnés solidairement, à cent cinquante mil liures, qui se-
ront pris sur tous & chacuns leurs biens, Ensemble és despens
du procès dommages, & interests: Sauf à Monsieur le Pro-
cureur general du Roy, prendre telles autres conclu-
sions qu'il aduifera bonnes estre pour l'expiation d'un si
execrable assassinat.

Lors que la nouuelle fut espanduë du meurtre com-
mis en la personne du feu Sieur de Prouuille, chacun
iugea aussi tost qui en auoient esté les autheurs & insti-
gateurs.

A



Les argumens en estoient visibles; On scauoit que la charge, que le feu Sieur de Prouille auoit en la ville & citadelle d'Amiens, joint la croyance qu'il y auoit acquise, n'estoit point vn petit empeschement aux desseins du Marquis d'Ancre: On scauoit que celuy qui auoit fait le coup estoit Italien, & auoit esté enuoyé à Amiens quatre iours auparauant par le Marquis d'Ancre & sa femme: On scauoit qu'il s'estoit retiré dedans la Citadelle; que de là il auoit esté conduit en lieu de seureté: On voyoit d'ailleurs vne pauvre vefue & de pauvres orphelins demandans iustice, traouiller pour neant, à cause des traueses qui leur estoient suscitées par le Mareschal d'Ancre & sa femme; Bref il n'y auoit personne qui doutast qu'ils ne fussent auteurs de ce detestable acte.

Le temps toutesfois estoit tel, & la tyrannie que ces deux personnes auoient vsurpée dedans ce grand & tres-puissant Royaume, poussée à vn si haut degré, que non seulement les plus courageux & plus fidels amis du feu Sieur de Prouille, n'eussent osé penser à assister la poursuite de sa vefue: mais mesmes que ces gens, que les Payens eussent eu en execration, & desquels ils eussent fuy la rencontre, estoient, ie ne diray point assistez, mais honteusement recherchez, & propudieusement vénérez par ceux mesmes que leur rang ou leur naissance obligeoit à toute autre chose.

Ce nonobstant ceste pauvre vefue ne perd point courage, elle fait ses poursuites en la Cour allencontre tant de celuy, que l'on auoit employé pour faire ce miserable coup, que de celuy qui auoit refusé de le liurer à la iustice, & qui l'auoit fait euader. Elle obtient diuers Arrests: mais lors qu'il est question de les executer, elle rencontre tant de difficultez, & de tant d'endroits, que si elle n'eust esté assistée d'en haut, il eust esté impossible de les surmonter.

Car d'un costé elle voyoit que quelques Arrests

qu'elle peüst obtenir, tout cela luy estoit inutile, ils ne seruoient qu'à exciter l'insolence de ces meurtriers & de leurs complices, & à faire recognoistre l'auctorité prodigieuse que ces viles personnes auoient empietée en l'estat. D'autre costé elle se voyoit iournellement menacée, & ses enfans en danger de courre la fortune de leur pere; & sous main recherchée par personnes interposées d'entendre à vn accord aduantageux, plustost que d'envelopper sa famille en vne ruine ineuitable.

Tout cela ne l'ayant peu fleschir, ny diuertir de ses poursuites, qu'elle a continuées avec des frais presque incroyables; Finalement la Iustice diuine, qui auoit toléré pour quelque temps ces monstres pour le chastiment de nos pechez, & afin de nous faire recognoistre d'vn costé les mauuaises humeurs qui crouissoient en cest Estat, & d'autre part les graces miraculeuses, dont il luy a pleu reuestir celuy qu'il a faict naistre pour la restauration de ce Royaume, afin qu'és desordres & confusions publiques, nous n'ayons recours qu'à Dieu & à celuy à qui il a mis le glaue en main, pour retrancher de dessus la terre, ceux qui en troublent le repos: La Iustice diuine, di-je, ayant faict tomber le foudre de l'indignation de son Oinct sur la teste de cemeschant, & en ce faisant redressé la vigueur & l'autorité des loys, la demanderesse a estimé deuoir ioindre ses plaintes particulieres aux plaintes publiques, & poursuivre la reparation de l'abominable assassinat commis en la personne du feu Sieur de Prouille son mary, tant contre la memoire du feu Marquis d'Ancre, que contre sa vefue & leurs complices.

Or que le defunct & sa vefue soient coupables de ce detestable meurtre, c'est chose que la demanderesse estime estre suffisamment prouuée, tant par la deposition des tesmoins, qui ont esté ouys à sa requeste, que par autres actes, ioint les circonstances qui ont esté cy-dessus touchées.

Le defunct Marquis d'Ancre s'estant fait pourueoir du gouuernement d'Amiens, contre les loix de l'Estat, commença sa domination iniuste & illegitime par la destitution de quelques-vns de ceux qui estoient en charge, afin de mettre en leur place des personnes qui dépendissent entierement de luy, & dont il se peust asseurer pour l'execution de ses mauuais desseins.

Il trouua le feu Sieur de Prouille en la charge de Sergent major, dont il auoit esté pourueu par le feu Roy HENRY LE GRAND de tres-glorieuse memoire, incontinent apres le recouurement de ceste place sur l'estranger.

C'estoit vne charge, qui luy auoit esté donnée, non par brigue ny par la voye de la faueur; mais par les suffrages des loix de tous Estats bien policez, qui affectent les charges & dignitez à ceux qui par leurs seruices & par les preuues qu'ils ont faictes de leur vertu & fidelité, s'en sont rendus dignes.

Le feu sieur de Prouille auoit seruy le Roy, & taché de rendre à sa patrie en toutes les occasions, les deuoirs ausquels vn Gentil-homme de sa qualité est obligé. Les playes & honorables blesseures, dont il estoit conuert; la perte d'une jambe, & les seruices qu'il auoit tout fraichement rendus au siege d'Amiens, estoient autant d'informations de sa valeur & de sa deuotion au seruice de son Prince. C'est pourquoy estant question de pouruoir à la seureté d'une place si importante, reconquise avec tant de trauaux & de hazards: Le feu Roy estima ne la pouuoir mieux confier qu'au feu sieur de Vic, à qui il en donna le gouuernement, & au feu sieur de Prouille, à qui il donna la charge de Sergent major, avec les appointemens ordinaires de huit cens escus; & outre vne pension de douze cens escus.

Vn autre peut-estre de la qualité du feu sieur de Prouille, eust estimé que ceste charge, quoy qu'en

vne place de telle importance ; ne correspondoit point à ses merites & seruices signalez : Mais eſtât conferée par vn ſi grand Prince, le ſieur de Prouille, qui ſçauoit d'ailleurs qu'on ne doit meſeſtimer aucune charge, en laquelle on a moyen de bien ſeruir ſon Prince, la receut avec toutes ſortes de deuotion.

Et auſſi Dieu le benit tellement en l'exercice de ceſte charge, que non ſeulement il y acquit la bienveillance & amitié de tous les habitans ; mais meſmes contenta ſa Maieſté, en telle ſorte, qu'elle luy en rendit des teſmoignages à diuerſes fois.

Le Marquis d'Ancre donc ayant trouué le ſieur de Prouille en ceſte charge, & voyant qu'il ne luy ſeroit point aiſé de l'en oſter à cauſe de ſa reputation, & de la croyance qu'il auoit acquiſe, taſcha de le practiquer & gagner à ſoy.

Et de faiſt luy ayant proteſté à diuerſes fois que ſon deſſein n'eſtoit que de bien ſeruir le Roy ; Le ſieur de Prouille veſcut quelque temps en bonne intelligence avec luy, & faiſoit eſtat de ſon amitié & bonne volonté.

Mais depuis, cet ambitieux & traître eſtranger, luy ayant fait ſentir quelque choſe de ſes mauuais deſſeins ; & le ſieur de Prouille là deſſus luy ayant remonſtré en homme de bien ce qu'il eſtimoit eſtre neceſſaire pour l'en diuertir, & le remettre au droit chemin : Ce mal-heureux eſtima que pour venir à bout de ſes mauidites intentions, il luy eſtoit de beſoin d'oſter ceſt empeſchement.

Pour y paruenir, il faiſt ſemblant de prendre en bonne part les aduis du ſieur de Prouille, & de les vouloir ſuiure : le faiſt venir en ceſte ville, où il le retient cinq ou ſix mois, diſant qu'il vouloit faire pour luy ; & en fin le renuoye à Amiens.

Le Sieur de Prouille eſtant de retour à Amiens, le Marquis d'Ancre apprend deux choſes de ſes eſclaues, qui eſtoient en la Citadelle : L'vne, que lediſt Sieur de Prouille, le iour meſmes de ſon arriuée eſtoit

allé saluër Monsieur le Duc de Longueuille: & l'autre, qu'il auoit appaisé les contentions qui estoient entre la garnison de la Citadelle, & les habitans de la ville, qui auparauant estoient à toutes heures sur le point de s'entretuer.

Si nouuelle depleut iamais au Marquis d'Ancre, ce fut celle-là: Il n'y auoit personne qu'il redoutast plus que MONSIEVR LE DUC DE LONGVEVILLE, la generosité duquel, qu'il n'auoit iamais sceu faire tant soit peu gauchir, ensemble son extraction *fatale aux estrangers & usurpateurs de l'Estat*, le faisoit trembler d'apprehension. Et aussi il esperoit par le moyen des diuisions qui estoient entre la Citadelle & la Ville, & qu'il attisoit tous les iours de plus en plus, auoir subject d'augmenter & renforcer la garnison; mettre le pied sur la gorge à ces pauvres habitans, & establir vne tyrannie assurée dedans ceste place.

Ayant donc receu ces aduis, il delibera aussi tost avec sa femme des moyens de se deffaire du Sieur de Prouuille, & d'executer ce qu'ils auoient proietté ensemble long temps auparauant.

Pour cet effect ils enuoyent en la Citadelle d'Amiens vn nommé Alphonse Italien, qu'ils auoient retiré auparauant, estant fugitif d'Amiens, pour auoir donné vn coup de poignard à vn garçon d'Apothicaire, qui auoit fait refus de luy vendre du poison.

Le vingt deuxiesme Iuillet mil six cens quinze, jour de la feste de la Magdeleine, quatre jours apres que ce meurtrier fut arriué, Vincence l'vn des Secretaires du feu Marquis d'Ancre est enuoyé en poste en la Citadelle. Là il fait scauoir ce qui estoit de la volonté de son maistre; & en suite de ce, trois heures apres son arriuée les Sieurs de Migneux & de Hoquincour, ensemble Hautecloque Enseigne commandant en la Citadelle, font prier le Sieur de Prouuille de s'y transporter pour communiquer avec luy d'affaires concernans le seruice du Roy.

Le sieur de Prouuille s'y transporte. On le veut retenir à dîner : (Et la fille de Montaubert l'un des Secretaires du Tyran s'est vantée, que s'il y fust demeuré, on luy eust fait boire d'un vin blanc qui eust fait le mesme effect que le poignard du meurtrier :) On le veut donc retenir à dîner : Ils s'en excuse, tant à cause que le matin il auoit communiqué, que pour son indisposition : Et estant sorty de la Citadelle, & monté à cheual, il est rencontré à cent pas de là par Alphonse, qui le saluë, & faisant semblant de luy vouloir donner la main, luy porte deux coups de poignard dans le sein, dont il tombe mort sur la place.

Après ce coup, le meurtrier se retire dās la Citadelle, où il est arresté par le Sergent la Pierre, qui ignoroit la menée, & mis entre les mains de *Haultecloque*, qui fait mine de l'emprisonner.

Mais estant sommé par deux Gentil-hōmes enuoyez de la part de Monsieur le Duc de Longueuille, gouverneur de la Prouince, & encore par cinq Archers enuoyez par le Lieutenant Criminel d'Amiens, de le représenter, il découure ce qui estoit de son intention : Car au lieu d'obeir à la iustice, & aux commandemens qui luy estoient faits de par le Roy, il ne fait autre response, sinon qu'il se chargeoit luy mesme du prisonnier, & qu'il en feroit ce qui luy seroit ordonné par le Marechal d'Ancre son Maistre.

Et de fait trois iours apres, le feu Marechal d'Ancre ayant fait sçauoir sa volonté à Haultecloque, par un Gentil-homme enuoyé expres, Haultecloque fait sortir luy mesme le prisonnier hors la Citadelle, à heure de minuiet, laissant la porte qui est du costé de la frontiere, ouuerte, & la citadelle sans commandement, sinon des Sieurs de Migreux & de Hoquincour, qui estoient arriuez trois iours deuant l'assassinat, & le conduit le matin avec trois soldats dans la ville d'Anuers.

Depuis ce temps là, la Dame demanderesse ayant fait tout ce qui luy a esté possible pour auoir iustice,

chacun ſçait les trauerſes qui luy ont eſté données par le Marquis d'Ancre & ſa femme : qui non ſeulement firent conduire le meurtrier en la ville d'Anuers; mais depuis encor ont retiré Hautecloque, qui l'y auoit conduit, en la Citadelle d'Amiens; où il a demeuré iuſques à ce que le feu Marquis d'Ancre l'ait quitée, & de là fut enuoyé à Quillebœuf, où il a reſidé iuſques au iour de la punition du Marquis d'Ancre. Et par ce moyen ils ont empeſché l'exécution de tous les Arreſts que la demandereſſe auoit obtenus, & faiſt tout ce qu'ils ont peu par autres voyes pour rompre le cours de ſes pourſuites.

Cela eſtant ainſi, il n'y a point de doute que le feu Marquis d'Ancre & ſa femme, ne ſoient coupables de ce meurtre abominable, qui eſtoit vn preparatif à vne entrepriſe beaucoup plus execrable, ainſi que la ſuite l'a monſtré.

*Mandatores
cedis perinde
ut homicide
puniantur.
Paul. v. Sent.
tit. xxiij. l.
Non idē. C.
de accus. l.
Non ſolum.
II. §. 3. D. de
iniur. l. 15.
D. Ad leg.
Corn. de
Sicar.*

Car c'eſt vne regle certaine & qui eſt non ſeulement du droit ciuil, mais du droit des gens, & tirée des principes meſmes de la nature, que celuy qui donne charge de faire vn meurtre, eſt autant ou plus coupable que celuy qui l'exécute, entant qu'en effect il en eſt l'auteur.

Or que le feu Marquis d'Ancre & ſa femme ayent commandé ce meurtre; qu'ils ayent employé le meurtrier Alphonſe pour l'exécuter : c'eſt choſe que la Dame demandereſſe eſtime eſtre plus que iuſtifiée, tant par les depoſitions des teſmoins ouys à ſa requête que meſmes par eſcrit.

Et auſſi, quelle apparence qu'Alphonſe, qui n'auoit iamais rien eu à démêſler avec le feu Sieur de Prouille, & qui auoit eſté réuoyé depuis peu en la Citadelle d'Amiens, par le feu Marquis d'Ancre & ſa femme, euſt entrepris vn tel acte, s'il n'y euſt eſté pouſſé d'ailleurs? Quelle apparence qu'il ſe fuſt ſauué dedans la Citadelle, & que Hautecloque euſt faiſt refus de le liurer à la Juſtice, ſ'il n'eũt eſté appuyé de celuy qui y commandoit?

Quelle

Quelle apparence que le Marquis d'Ancre & sa femme eussent commandé à Hauteclouque de le conduire en lieu de seureté; & que depuis ils ayent continué de se servir d'iceluy Hauteclouque tant en la Citadelle d'Amiens qu'à Quillebeuf, nonobstant tous les arrests obtenus par la demanderesse, si ce meurtre n'eust esté commis de leur ordonnance?

Lors que Philippes penultieme Roy de Macedoine, fit saccager Maronée par ceux qui estoient dedans en garnison pour luy, il pensoit en estre quite pour desaduouër le faict, & dire, que cela estoit aduenü par vne sedition & contention particuliere: Mais les Ambassadeurs de Rome ne prirent point cela en payement: *Negare Appius, remevidentem pro dubia querendam; si abs seculpam remouere vellet, Onomastum & Cassandrum, per quos acta res diceretur, mitteret Romam, ut eos Senatus percunctari posset.*

T. Liv. lib. 39.
xxxix.

De mesme Iosephe remarque qu'un nommé Ammonius ayant tasché d'attenter à la personne de Ptolomée Philometor Roy d'Egypte, & apres s'estant retiré pres d'Alexandre Roy de Syrie, Ptolomée requit Alexandre de mettre Ammonius entre ses mains pour le punir. Ce qu'Alexandre n'ayant point faict, on iugea qu'il auoit commandé l'assassinat luy mesme.

L. xiii. Iudae.
Orig. cap. viii.

Cela estant ainsi, voyons si les accusez peuuent auoir quelque espece de defences: & la verité est, qu'ils n'en peuuent auoir aucunes pertinentes. Voyons neantmoins ce que lon peut dire, quoy qu'impertinent.

ἐκ ἐκδοῦν
τοῦ δὲ τῶ Α-
λεξάνδρου,
σωεῖς ἐκεί-
νον ἵνα τὸν
ὁμιλοῦν-
σαντα, χα-
λεπῶς πρὸς
αὐτὸν διετί-
θη.

PREMIEREMENT donc on pourra dire, Qu'encores que le feu Marquis d'Ancre se trouue chargé du meurtre, dont il s'agist, si est-ce qu'il ne se trouuera point que sa veufue y soit enuveloppée si auant. Quant à Montaubert & Vincence, que ce ne sont que simples valets, qui ont executé les cōmandemens de leur Maître; & pour ce qui est du feu Marquis d'Ancre, qu'estant decedé, le crime est esteint, & n'y a plus lieu de luy

faire son procès. Commençons par ce dernier point.

On demeure donc d'accord, que de disposition de droict les crimes s'esteignent par la mort de ceux qui les ont commis; mais il y a deux distinctions à faire.

Car premierement il est certain que ceste maxime la faut au crime de leze Majesté, duquel on faißt la recherche mesmes apres la mort de celuy qui en estoit chargé, *l. ult. D. ad leg. Iul. Maiest. l. 6. 7. & 8. C. eod.*

Or que le meurtre commis en la personne du feu sieur de Prouille soit vn crime de leze Majesté, il n'y a point de difficulté, sauf la correction de la Cour: & voicy les raisons.

Car en premier lieu, si on considere la qualité du feu Sieur de Prouille, il estoit Sergēt major tant de la ville que de la Citadelle d'Amiens, là estably par le feu Roy pour la garde & seureté de la place la plus importante de tout le Royaume. Or la Loy declare criminel de leze Majesté celuy *cuius opera, consilio, dolo malo consilium initum erit, quo quis Magistratus Pop. Rom. quive imperium, potestatemve habet, occidatur. L. 1. §. 1. D. ad leg. Iul. Maiest. & celuy qui inierit factionem de nece eius qui Imperatori militat. l. 5. C. eod.*

En second lieu, (Et ce point est grandement important) il est vray que le meurtre du feu Sieur de Prouille n'est autre chose sinon vn des effects de la tyrannie que le Marechal d'Ancre auoit vsurpée, & vn des principaux moyens, dont il se vouloit seruir pour l'estayer & affermir plus seurement. Voyons comment.

Q V A N D il fut intrus au gouuernement de la ville & Citadelle d'Amiens; La verité est que tous les gens de bien gémissoient de voir vne place de telle importance, pour le recourement de laquelle on auoit tant perdu de gens de bien, tant de braue & genereuse noblesse, & pour laquelle mesme le feu Roy auoit exposé sa vie: De voir, di-je, ceste place entre les mains d'un homme de neant, sans courage, sans vertu, sans experien-

ce, sans merites, *monstri nulla virtute redempti*. On gemittoit de veoir vne des colonnes de l'Estat, à sçauoir la reigle qui affecte les recompenses aux gens de bien, & les peines aux meschans, ainsi miserablement ébranlée, & presque renuersee. On craignoit que cela fist perdre courage aux personnes de valeur, si les recompenses estoient données non à la vertu & aux merites, mais abandonnées à la lascheté. On craignoit que cela n'acheuast de gaster les mœurs de nostre nation; & qu'au lieu de rechercher les charges & dignitez par les voyes de la vertu, on prist vn chemin contraire, puis qu'il n'y en auoit point d'autre pour y paruenir. Mais les clairvoyans passoient bien plus auant, & iugeoient qu'une place si importante, & qui est vn des bouleuars de la France, estant entre les mains d'un chetif estranger, débordé en son ambition, elle couroit grand hazard, & luy pouuoit faire naistre l'enuie de tres-pernicieux desseins.

L'EVENEMENT a monstré qu'on ne se trompoit point: car il ne fut point plustost dans ceste place, qu'il commença à conceuoir d'estranges choses. Il pensa donc premierement à s'en asseurer & à se l'approprier entierement. Et pour cet effect il changea tous les Officiers qu'il peust, & mist des gens de sa faction, c'est à dire des gens à tout faire, en leur place; voire passa si auant, que de remplir ceste Citadelle d'estrangers, contre lesquels elle auoit esté bastie.

Ceux qui ont escrit de la Politique, remarquent que les Tyrans, ou ceux qui veulent empieter vn Estat, se seruent plustost d'estrangers que d'autres: & la raison, d'autant que leur principal soin estant de se fortifier contre les subiects naturels lesquels ils oppriment, il faut qu'ils prennent leur force de hors. C'est ce que l'histoire remarque que fit Tarquin, auquel à cause de ses insolens & violens deportemens elle a donné le nom de *Tit. Linus lib. I. Dionys. Hal. lib. iv. Antiq. Roman.* Superbe; *Latinorum sibi maxime gentem conciliabat, et peregrinis quoq; opibus tutior interciues esset.* Et c'est ce que fit

οι πολλοι ο-
λαστοισιν ο-
ποιοις τις βασι-
λεις, τοις δ' πω-
ροισιν ξενι-
κόν. *Aristotel.*
lib. III. Polit. c.
x. & lib. v.
cap. x.

pareillement cet insolent Italien. Car ayant conçu de furieux desseins contre l'Estat, & se voulant seruir de ceste place à cet effect, il estima se deuoir asseurer principalement de nos voisins, dont il remplit non seulement la Citadelle, mais la ville mesme & tout le Gouuernement, & n'y laissa autres gens de nostre nation, que ceux qu'il estimoit auoir despoüillé toute affection enuers leur patrie, & n'auoir autre regle de leur deuoir que leur profit & le moyen de faire leurs affaires, *queis neque boni intellectus, neque malicia.*

Or dautant que le feu sieur de Prouuille auoit des qualitez toutes contraires, ce n'estoit rien fait, si on ne se desfaisoit de luy. C'estoit vn fascheux obstacle aux desseins de ce tyran malotru. C'est pourquoy il le falloit oster. Autrement il n'estoit point aysé d'establir sa tyrannie, ny d'acheminer ses affaires au point qu'il s'estoit imaginé.

Lib. II. Hist.
Gr.

Critias, l'un des trente Tyrans d'Athenes, disoit dedans Xenophon, que toutes mutations d'Estat, c'est à dire, toutes vsurpations tyranniques sont accompagnées de meurtres & d'assassinats : *ὅτι εἰς τὸν δῆμον πάντα μεταβολὰς πολιτικῶν θανάτοφοροι.* & luy-mesme en rend la raison ailleurs, d'autant, dit-il, qu'il est impossible à ceux qui entreprennent sur vn Estat, de donner perfection à leur entreprise, sinon en ostant ceux qui ont le plus de moyen de leur y apporter de l'empeschement. *ὁ δὲ αἰτιάζειν ὅτι ἐκ ἐλχρότητος τοῖς πλεονεκτεῖν βυλομεθοῖς, μὴ ἐκ ἀποδῶν ποιῆσαι τοὺς ἰκανοὺς πρὸς διακονίαν.*

Eod. lib.

C'est ce que ce malheureux estranger a bien sceu pratiquer, ayant par toutes sortes de moyens tasché de se desfaire de tous ceux qu'il estimoit pouuoir s'opposer à sa coniuration furieuse & forcenée, s'estant attaché mesmes aux plus grands, & qui à cause de leur extraction & de leur qualité estoient plus particulièrement obligez à la defense de l'autorité Royale, & plus interessez en la conseruation del'Estat; ayant jetté la diuision dedans tous les ordres, & entre toutes sortes de personnes &

de qualité ; ayant suscité des calomnies & delations de toutes parts contre ceux qu'il vouloit opprimer ; ayant remply les prisons de ceux qui luy estoient suspects , & passé bien plus auant.

— *causis fallacibus instat ,*

Arguit attonitos se indice.

— *non flectitur annis ,*

Non etate labat ; iuuenum rorantia colla

Ante patrum vultus stricta cecidere securi.

Mais la demanderesse a particulierement senty les effects de ceste caballe tyrannique ; le feu sieur de Prouille son mary , ayant esté vne des premieres victimes immolées à l'ambition de cest estranger.

Or cela estant ainsi , il n'y a plus de lieu de douter que l'assassinat du feu sieur de Prouille n'ait esté , non seulement vn acte de la tyrannie du feu Marquis d'Ancre & de sa femme ; mais vn des principaux moyens dont ils se sont voulu seruir pour mener à fin les desseins sacrileges qu'ils auoient cōceuz contre la Majesté du Roy & contre son Estat : & consequemment que nous ne soyons aux termes des loix qui declarent criminels de leze Majesté, *perduellionis reos*, ceux qui *hostili animo aduersus* *L. ult. D. ad leg. Jul. maiest.*
Remp. vel Principem animati sunt.

Et aussi ce n'a point esté la consideration de la personne du feu sieur de Prouille , qui luy a porté le poignard dans le sein ; le Marquis d'Ancre ny sa femme n'auoient aucun subiect particulier de haine ny de mauuaise volonté alencontre de luy : Ce n'a esté autre chose que sa fidelité au seruice du Roy , contre l'autorité duquel se dressoient tous les desseins de ces ennemis publics.

Le feu Roy HENRY LE GRAND , ayant reconnu & esprouué en infinies occasions la fidelité & generosité du feu Sieur de Prouille , luy auoit donné vne charge importante en vne place , sur laquelle l'estranger a eu perpetuellement l'œil : Le Marquis d'Ancre y voulant mettre ceux contre lesquels le sieur de Prouille auoit esté principalement choisi , faict tuer le sieur

de Prouuille. Est-il point vray que le meurtre du sieur de Prouuille n'est autre chose qu'une usurpation de ceste place sur le Roy, & une prodicion d'icelle aux estrangers?

*L. ult. D. de ver.
diss. l. 2. D. ne
quid in loc. sac.
fide.*

Que si l'antiquité a reputé les portes & les murailles d'une ville choses saintes, & a puny de mort ceux qui les auoient tant soit peu endommagées comme ennemis publics, à combien plus forte raison iugera-on tels ceux qui osent attenter à la vie de ceux qui ont esté ordonnez pour la garde des villes & places importantes, & qui par ce moyen taschent s'en rendre maistres absolus?

Puis donc que ce meschant acte faict partie de ceux pour raison desquels, le feu Marquis d'Ancre doit estre déclaré coupable de crime de leze Majesté, & sa memoire damnée; pourquoy ne sera-il point permis à la vefue & aux enfans du feu sieur de Prouuille, de ioin-dre leur plainte à celle de Monsieur le Procureur general, & demander la reparation ciuile, qui leur est deuë, sur les biens de cest Aman? Voyla quant à la premiere distinction.

Mais il y a dauantage: c'est que quand on iugeroit, ce qui ne peut estre, sous correction, que ce detestable crime se seroit euanoüy avec les cendres de celuy qui l'a faict commettre, si est-ce que la demanderesse seroit tousiours bien receuable à demander la reparation, & interets ciuils sur les biens du defunct.

Il est bien vray que l'on a iugé, que la prescription de vingt ans exclud aussi bien la demande de la reparation ciuile, & des dommages & interets, que la poursuite criminelle; mais c'est d'autant que ceste prescription ayant esté introduite en faueur de l'innocence, laquelle il seroit ayse d'opprimer si on receuoit une poursuite criminelle apres un si long temps, durant lequel un accusateur auroit peu fabriquer des preuues telles que bon luy auroit semblé, & un accusé perdre les moyens de sa iustification; si la poursuite estoit receüe

pour ce qui concerne les dommages & intereſts, & reparations ciuiles, elle ſeroit auſſi indirectement receuë, pour ce qui concerne la reparation publique: Car on ne peut adiuger aucune reparation ciuile, que celuy cõtre qui on l'adiuge, ne ſoit cõuaincu du crime.

Il en va autrement quand le criminel decede dedans le temps, durât lequel il pouuoit eſtre pourſuiuy: Car le crime eſtât eſteint, non par la preſcription, mais par la mort du criminel, rien n'empêche qu'en ce cas, on ſe pouruoye pour les intereſts & reparations ciuiles: Et à cela eſt expreſſe la loy *Defuncto. D. De publ. indic.* Et la raiſon en eſt indubitable par le droit particulier de ce Royaume: d'autant que la pourſuite de la peine & reparation publique eſtant de l'office de Monsieur le Procureur general, ou de ſes Subſtituts; & la pourſuite de la reparation ciuile, & des dommages & intereſts eſtant reſeruée aux particuliers, & parties intereſſées; c'eſt vne action ſeparée, qui ſubſiſte d'elle meſme, & pour laquelle il n'y a point de doute que l'on ne puiſſe agir contre les heritiers, ou autres qui ont recueilli les biens du criminel; ainſi qu'il a eſté iugé par diuers Arreſts, meſmes par vn notable donné en l'audience de la Tournelle, le vingt-ſeptieſme Nouembre mil ſix cens dix, ſur les conſultations de Monsieur l'Aduocat general Seruin. Voyla pour ce qui eſt du premier poinct concernant la memoire du Marquis d'Ancre.

Quant à ſa veſue, la verité eſt telle, qu'encores que la preuue ne ſoit point peut-eſtre iuſques à preſent ſi forte contre elle que contre le defunct, ſi eſt-ce qu'elle eſt autant ou plus coupable que luy.

Car premierement, il eſt notoire que non ſeulement elle a eu part à tous ſes deſſeins & pernicieuſes reſolutions; mais meſmes qu'elle en a eſté le plus ſouuent inſtigatrice. Il n'y a perſonne qui ne cognoiſſe ſon ambition demeuſurée & ſon auarice inſatiable; qui ſont les deux principales ſources de tous les maux qui ont rauagé ceſt Eſtat. Ces deux paſſions ont des effets ſu-

rieux où elles s'affermissent , mais principalement quand elles se rencôtrent en la femme, laquelle estant née pour obeir & estre assuiettie à la conduite du sexe plus parfait, si elle vient à prendre part à l'auctorité *du mary,* ou à auoir le dessus; c'est vn miracle si elle en vse avec moderation.

Et aussi on sçait iusques où ceste creature en est venue. Car que n'a-elle point faiât pour paruenir à ses fins? quelle sorte de crimes, voire de prodiges n'a-elle point commis pour celà?

*Tu potes vnanimes armare in prelia fratres;
Atque odijs versare domos; tu verbera tectis,
Funereaſque inferre faces; tibi nomina mille,
Mille nocendi artes; ſæcundum concute pectus,
Diſſice compositam pacem; ſere crimina belli.
Arma velit poſcatque ſimul rapiatque iuuentus.*

Cela estant ainſi, qui peut douter que ceste femme, qui auoit pourchassé ſi furieusement le gouuernement d'Amiens pour son mary; & lequel tout le monde a creu qu'elle auoit faiât vaquer par les moyens que chacun ſçait: Ceste femme, di-ie, qui auoit empiété vn tel empire ſur tout le monde, & ſur son mary meſme, qu'il n'eust oſé entreprendre la moindre choſe ſans luy auoir faiât agreer: Qui peut, di-ie, douter qu'elle n'ait eu communication de ce mal-heureux attentat, voire qu'elle nel'ait commandé? Il n'y auoit perſonne ſi hardy d'y oſer ſeulement penſer, ſi on n'eust eſté aſſeuré de ſa volonté.

Et aussi a-elle bien faiât veoir quelle part elle auoit en l'affaire, empeſchant que la Dame demandereſſe peult approcher du lieu où elle eſperoit principalement auoir iuſtice; & traueſant ſa poursuite par toutes ſortes de moyens.

Mais lors qu'elle & ſes complices ſeront appliquez à la queſtion, tant pour le ſubject de ce crime, que de tous les autres, il n'y a point de doute que lon ne ſoit inſtruit bien particulièrement de tous les actes de ceste ſanglante tragedie.

Quant

Quant aux autres complices, qui ont eu part en ce detestable acte, ou pour auoir participé en la deliberation de ceux qui l'ont commandé, ou pour en auoir facilité l'execution, ou pour auoir assisté l'evasion de celui qui l'a commis, il n'y a rien qui les puisse excuser.

Car premieremēt, quant à Montaubert & Vincence, de dire que ce ne sont que simples valets, qui ont esté obligez d'executer les cominandemens de leur Maistre: ce sont excuses que la loy ne reçoit point, mesmes estant question d'un crime si atroce. *Servus non in omnibus rebus sine pœna domini dicto audiens esse solet: sicuti si dominus hominem occidere, aut furtum alicui facere servum iussisset.* L. 20. de obligat. & act. l. ii. § 7. D. quod vi aut clam. l. 17. §. 7. D. de iniur. l. 137. De regul. iur.

Et certes ce n'est point en cest acte seulement, que ces deux valets ont seruy meschamment leur Maistre; mais en infinis autres, voire en tout le reste de ses violences, oppressions, depredations, assassinats, empoisonnemens, pratiques & menées estrangeres: & particulierement il se peut dire de Montaubert, que ç'a esté vn des plus abandonnez instruments de la tyrannie du defunct, qu'homme qui fust à son service.

Et quant aux autres qui ont presté leur ministere à cest usurpateur, pour faire reüssir le meschant dessein qu'il auoit cœceu contre le feu sieur de Prouille, & lequel en fin il a si mal-heureusement executé, que peut-on dire pour les soustraire à la iuste punitiō, qui est deuë à vn tel crime? Qui les obligeoit à vne meschanceté si execrable?

Mal-heureux, qui auez entant qu'en vous a esté, honny l'honneur de vostre patrie: Qui par vos viles, abiectes & infames prostitutions, auez abbaissé la gloire de nostre nation; & presques enseuely son nom, cy-deuant glorieux & plein d'effroy, dans l'opprobre & l'ignominie; Mal-heureux, qui par vos laches submissions auez esleué ces monstres, qui ont pensé deschirer ce grand & florissant Royaume; qui en auez fait vos Dieux & auez honteusement idolatré apres eux;

qui non seulement auez executé leurs ordonnances avec
tremblement : mais les auez preuenu ; mais auez
encheri par dessus ; Bref, à qui il n'a point tenu que ces
forcenez ne se soient entierement emparés de la puis-
sance & autorité sacro-saincte.

— *infame nocentum*

Concilium, qui perpetuis creuere rapinis,

Et quos una facit Rufino caussa sodales,

Illicitum duxisse nihil, delicta fuere

Nexus amicitia.

Or la demanderesse espere de la iustice de la Cour,
de la Iustice de ce grand Parlement, à qui LOUIS LE
JUSTE à conserué la gloire & la splendeur, que ces Far-
ries auoient cy-deuant proietté d'enseuelir dedans
les ruines de la France, que non seulement la repa-
ration ciuile, qui luy est deuë & à ses enfans sur tous les
biens de ces meurtriers, leur sera adiugée, eu esgard à la
grandeur de la perte qu'ils ont faicte, qui est immense
& inestimable, & aux frais extremes qu'elle a esté con-
traincte de supporter, n'ayant peu faire donner vn seul
exploict qu'à force d'argent, iusques à auoir donné cin-
quâte escus quelquesfois pour faire signifier vn Arrest,
ou quelque autre acte, le plus souuent inutilement ;
ayant esté contraincte d'enuoyer à diuerses fois hors le
Royaume à tres-grands frais ; & employé en toutes ces
poursuites plus de vingt mil liures : Mais aussi que ces
meurtriers, qui luy ont si meschamment rauy son mary,
& rendu ses enfans orphelins, seront retranchez de
dessus la terre souillée du sang qu'ils ont si mal-heureu-
sement espandu.

Et elle s'attend à ceste iustice avec d'autant plus de
certitude, que le public y a autant ou plus d'intérêt
qu'elle.

Car qu'y a-il non seulement de plus iuste, mais de
plus expedient & necessaire pour l'establissement de la
seureté publique, que de punir exemplairement ceux,
qui sans respect d'aucun deuoir, de la fidelité qu'ils doi-

uent naturellement à leur Prince, de la deuotion, à laquelle ils sont obligez enuers leur patrie, de la charité & affection qu'ils doiuent à leurs concitoyens, se sont si laschement abandonnez aux passions de deux miserables estrangers, les ont si honteusement seruy en tout ce qu'ils ont desiré d'eux pour l'oppression de leur patrie: ont si meschamment souillé leurs ames dedans leurs conseils sanguinaires, & trempé leurs mains dedans le sang de leurs compatriotes: & finalement ont si peu estimé leur vie, la hazardant si temerairement pour afferuir leur nation, qu'on ne doit point faire de scrupule de la donner avec iustice à l'establissement de sa liberté: Car comme Guntran apres l'assassinat du Roy Chilperic son frere, iura qu'il feroit mourir non seulement le meurtrier, mais toute sa race, afin d'abolir entierement ceste malheureuse coustume d'attéter à la vie des Roys; Aussi faut-il tellement chastier ceux qui se sont si laschement prostituez à vne tyrannie estrangere, que cela serue d'exemple à la posterité, pour empescher que d'autres facent le mesme.

Et aussi que scauroit-on esperer de telles gens? En vne domination legitime dequoy peuuent seruir des instrumens de tyrannie, sinon de fabriquer encor quelque nouvelle faction? Nous lisons dans l'histoire de l'Empire Romain, que l'Empereur Pertinax ayant approché de soy Lætus & Martia, le Consul Falco s'en offensa bien fort: car, disoit-il, *Que scauroit-on esperer de ton administration, voyant à tes costez les Ministres des meschancez de Commodus?* A quoy Pertinax pensant auoir fait vne response de prudence & d'accommodation, disant que ce qu'ils auoient fait auoit esté par contrainte, & forcez de la loy de la necessité contre ce qui estoit de leur sentiment, l'euénement monstra bien que ce vieillard, quoy que tres-aduisé, & grandement expérimenté, s'estoit bien fort trompé, ceux-là mesme

Pertinax, Falco Consul dixit, Qualis Imperator es futurus hinc intelligimus, quod Læti & Martiana ministros scelerum Commodi post te videmus. Cui Pertinax respondit, Iuuenis es Consul, nec parendi scia necessitatem. Paruerunt inuiri Commodi; sed ubi habuerunt facultatē, quid semper vouerint, ostenderunt.

Aimoîn. li. xii. c. lxxv. Rex igitur felle commotus, circumstantibus amicis iurauit, se non solum homicidam, verum cunctam eius perdituram generationem, quatenus usus interficiendorum Regum de regno tolleretur Francorum.

Iul. Capitolin⁹ in Pertinace: Ipse autem Pertinax egit gratias Senatui, & præcipue Læto Præfecto Prætorij, quo auctore & Commodus interuenit, & ipse Imperator est factus. Sed quum Læto gratias egisset

^a Idem Capito-
linus: Sed Per-
tinaci factio
ayans depuis dressé la menée qui luy osta la vie avec
l'Empire.

Mais passons plus auant, & finissons par là; Car que
peut-on esperer de bien, tandis qu'on laissera ces meur-
triers sur la terre? Les Payens estimoient que toute vne
ville, tout vn estat estoit souillé par le meurtre d'un
homme; ^b si la punitiō n'en estoit faicte, ils imputoient

^b Dionys. Hal.
lib. iii. Antiq.
Roman
à cela toutes les calamitez publiques, les sterilitez, les
sechereffes, & autres playes dont Dieu visite les peu-
ples; ^c Si quelqu'un en estoit seulement accusé, on le

^c Antiphon de
Herodis cede.
οἱ δὲ νόμοι ὅτι τὰς
ἐκείνῃ, ἐπὶ δὲ αὐ-
τῆς ἀποδείκνυται
φόνος διὰ τὸ
ἐργασθαι αὐτῇ
νομίμους.
chassoit des villes, des marchez, des temples, & autres
places publiques, ^d on en fuyoit la rencontre, la veuë;
la parole: ^e & mesmes les iugemens de ces crimes se fai-
soient en lieux decouverts, de peur que les Iuges &
ceux qui poursuyuoient la reparation ne se rencontra-
sent sous vn mesme toict avec ceux qui estoient ac-

^d Demosth.
Orat. i. contra
Aristogit. Di-
narchus contra
eundem; Ly-
sias contra
Agorathum: &
aliq.
cusez de meurtre. Si quelqu'un protegeoit le meurtrier
ou sollicitoit pour luy, & empeschoit que la iustice en
fust faicte, ils croyoient ^f qu'il attiroit vne execration
horrible sur luy, & sur sa maison: & au contraire, si on
en faisoit iustice; ils estimoient ^g que la ville estoit des-
chargée des maledictions qui accompagnēt vn tel cri-
me; & ces opinions ne procedoient point d'une vaine

^e Antiphon de
Herodis cede,
ἀπὸ τῆς τοῦ δὲ
κατακτείναντος ἐν ἡ-
μεῖς φόνου διὰ τὸ
ἐργασθαι αὐτῇ
φόνου, &c.
persuasion & phantasie des hommes; ^h c'estoient des in-
structions de ceste loy emprainte par la nature, & es-
crite és cœurs des hommes, afin de les rendre inexcu-
sables; c'estoient doctrines puisées és ruisseaux que
lon auoit destourné de la source diuine, ainsi que nous

apprenons particulierement au chap. xxj. du Deutero-
nome, ⁱ où les ceremonies que lon obseruoit pour l'ex-
piation d'un tel crime, sont particulierement speci-

^g μάλιστα εἰς τὸν οἶκον εἰσέλκεν. Dionys. Hal. lib. iii.

^h πῶς καθάρσει μάλιστα καὶ ἡσυχασθαι. Antiphon: τὸ ἄγος ἀφαιρῆσθαι. Dionys. Halic. lib. ii.

ⁱ B. Paul. ad Roman. cap. ii.

Quando inuentum fuerit in terra, &c. & venient maiores natu ciuitatis illius ad interfec-
tum, lauantque manus suas super vitulam, quæ in valle percussa est, & dicent, Manus nostre non effuderunt sanguinem
hunc, NEC OCULI VIDERUNT. Propitius esto populo tuo Israël, quem redemisti. Domine, &
ne reputes sanguinem innocentem in medio populi tui Israël.

fiées, & les protestations excellentes du peuple, accompagnées d'une priere fervente à Dieu, afin de détourner son ire esmeuë par l'horreur d'un tel crime, grauelement exprimées. Ce qu'il faut confesser que les idolatres, qui n'ont eu que des bluettes & estincelles de ceste cognoissance, ont beaucoup plus religieusement pratiqué que nous que Dieu a esclaré d'une si grande lumiere. Car si ceste doctrine estoit bien estable entre nous, ceste pauvre vefue & ses pauvres enfans orphelins seroient-ils encor en peine de demander iustice? Aussi tost que ce malheureux acte fut commis, les meurtriers, eussent-ils point esté abandonnés & mis entre les mains de la iustice? Se fust il trouué des gens, voire des gens sans qualité, ou au plus, simples Gentils-hommes si hardis que de s'opposer avec tant d'impunité à l'exécution des Arrests?

Certes les mesmes Payens ont eu une autre opinion qui n'estoit point du tout vaine, du moins c'estoit une ombre de la vraye opinion, que nous devons auoir, enuelpée dedans les nuages du Paganisme; car ils estimoient que les Manes de ceux qui auoient esté ainsi proditoirement assassinez, ou iniquement & tyranniquement opprimez, ne reposoient iamais iusques à ce qu'ils eussent fait faire iustice de ceux par qui ceste oppression leur auoit esté faite. C'est ce que disoit Cyrus dedans Xenophon: C'est ce que remarque un Lib. viii. Κύρ. grand Historien, parlant de la punition exemplaire, παρ. qui auoit esté faite de plusieurs des Decemvirs apres Tit. Linius lib. III. infinis actes tyranniques, & finalement apres l'injustice enorme faite à Virginia, fuyue d'un meurtre pitoyable. *Manesque Virginie mortue quam viue feliciores, per tot domos ad petendas pœnas vagati, nullo relicto sonte tandem quieuerunt.* Mais sur tout est excellente la remarque que fait Iosephe en l'histoire Iudaïque, où apres auoir décrit les grandes conspirations qui furent descouuertes par Herode, & qui luy auoient esté brassées par son frere Pheroras, par sa femme Doris, & par son fils

Antipater, tous lesquels auoient faict mourir par vne calomnie nompareille, & artificieusement conduite, Alexandre & Aristobulus fils du mesme Herode, & de Mariammé, & ausquels Herode mesmes auoit faict le procès, quoy qu'auparauant il les aimast si chèrement qu'il n'estoit possible plus; après donc auoir recité toutes ces conspirations descouuertes quasi par vn hazard, & par le moyen de la question qu'on auoit donnée à des esclaués pour autre subiect, d'où s'ensuiuit vne signalée punition des coupables, il finit par là: *Or les Manes, dit-il, d'Alexandre & d'Aristobulus se pourmenoiēt parmy tous les coins de la maison Royale, furetant & descouurans des choses qui auparauant estoient entierement cachées, & tirans en Iustice & à la question ceux mesmes que lon eust estimée estre les plus esloignez de tout soupçon.* *Μενοιπες δ' οι Αλεξανδρος & Αριστοβουλος διαμυροντες απαντι βασιλικοι, βδυνηται περ & μελωτοι οντι ανδρων εχθρον, πικρι παρρωπατωσιν υπουφιας οντας εσυρονεις πικρ εγχρους.*

Il est à croire que les Manes du feu sieur de Prouuille, & de tant d'autres gens de bien meschamment & tyranniquement opprimez par ces Tyrans & leurs ministres,

Anime, quas ille FEROS sub IVRE peremit,
pourchassent aujourd'huy la vengeance, non seulement des crimes qui sont desia cognus, mais de plusieurs autres qui sont demeurez cachez iusques à present. Et qui sçait si les Manes de celuy pour qui on a tant versé de larmes par toute la Chrestienté, & qui iusques à present n'ont esté vengez que par la simple indignation de ceux qui ont detesté & detestent encore vn si horrible, si execrable & si abominable parricide, sont point ceux qui pressent le plus la vengeance de l'audace inouïe de ces gens, qui ont si impudemment rauagé vn Royaume, lequel avec tant de trauaux & de perils il auoit laissé si glorieux?

CONCLVD la Dame demanderesse comme dessus.



MARIE BOCHART.



